

MAJLIS PELANCARAN PROGRAM PERTANIAN BANDAR PERINGKAT LEMBAH KLANG



Penulis : Abdul Hadi Mustapa Kamar

Foto : Mohd Fadzlee Borhan

Ampang, 16 Julai - Program Pertanian Bandar Peringkat Lembah Klang merupakan satu inisiatif hasil kerjasama NBOS antara Kementerian Pertanian dan Industri Asas Tani dan Kementerian Kesejahteraan Bandar, Perumahan dan Kerajaan Tempatan bagi menggalakkan aktiviti pertanian di kawasan perumahan di bandar terutamanya di kalangan penduduk untuk membantu mereka dalam mengeluarkan sendiri bahan makanan seperti sayur-sayuran, herba, ulam-ulaman dan rempah-ratus yang lebih segar dan bersih, sekaligus dapat mengurangkan kos sara hidup penduduk bandar dan pinggir bandar.

Susulan itu, satu majlis pelancaran Program Pertanian Bandar Peringkat Lembah Klang 2017 telah diadakan di Sekolah Kebangsaan Taman Nirwana, Ampang, Selangor pada hari ini. Program ini juga berperanan dalam menggalakkan interaksi sosial penjawat awam dan

penduduk tempatan dalam menggalakkan penduduk menghasilkan bahan makanan sendiri yang lebih terjamin kualiti dan keselamatan makanan mereka.

Bagi Kementerian Kesejahteraan Bandar, Perumahan dan Kerajaan Tempatan menyatakan bahawa program ini juga berperanan sebagai salah satu strategi untuk menggalakkan interaksi sosial antara penduduk tempatan. Selain itu, ia dapat membantu meningkatkan motivasi diri penduduk yang terlibat dengan kemampuan untuk menghasilkan produk makanan sama ada untuk kegunaan sendiri atau untuk dijual dengan menjamin kualiti dan keselamatan makanan tersebut. Pertanian bandar turut menyediakan ruang rekreasi dan peluang pendidikan pertanian kepada para pelajar.

Sejak Program Pertanian Bandar dilaksanakan oleh Jabatan Pertanian Malaysia pada September 2014 sehingga 2016 sebanyak 2,715 lokasi projek dengan penglibatan seramai 63,129 peserta di seluruh negara telah terlibat dengan program ini, melibatkan peruntukan sebanyak RM10 juta. Bagi tahun 2017 pula, seramai 17,000 orang peserta yang melibatkan sebanyak 480 lokasi disasarkan akan terlibat dalam program Pertanian Bandar.

Kementerian Kesejahteraan Bandar, Perumahan dan Kerajaan Tempatan melalui Jabatan Landskap Negara tidak ketinggalan menggalakkan masyarakat bandar untuk melaksanakan pertanian bandar. Pelaksanaan adalah berkonsepkan kebun komuniti di kawasan lapang dan kawasan hijau seperti taman kejiranan dan taman awam melalui pertubuhan atau gerakan Rakan Taman. Sehingga kini terdapat lebih daripada 250 buah Rakan Taman di seluruh negara dan sejumlah 58 Rakan Taman melaksanakan kebun komuniti.

Kementerian Kesejahteraan Bandar, Perumahan dan Kerajaan Tempatan menyeru kepada pegawai-pegawai penyelaras di 22 DUN dalam negeri Selangor untuk mengusahakan penubuhan Rakan Taman di tempat mereka bagi merencanakan lagi program ini. Program Pertanian Bandar ini juga diharap ini terus mendapat sokongan dari setiap individu, masyarakat, institusi, jabatan dan agensi yang terlibat supaya matlamat utama pertanian bandar ini untuk membantu isi rumah bandar meringankan kos sara hidup melalui pengeluaran bahan makanan sendiri dapat dilaksanakan dengan jaya dan berterusan. Selain daripada dapat menghidupkan persekitaran malah dapat menyatupadukan dan membentuk komuniti yang sihat, mesra dan produktif.